

01 MAY 1999

Azizah-Filipina

WAN AZIZAH NAFI TIDAK BERSIKAP PATRIOTIK DI LUAR NEGARA

KOTA BAHARU, 1 Mei (Bernama) -- Presiden Parti KeADILan Nasional (Keadilan) Datin Seri Dr Wan Azizah Wan Ismail hari ini berkata beliau tidak memburukkan nama baik Malaysia semasa berada di Filipina baru-baru ini.

Isteri bekas Timbalan Perdana Menteri Datuk Seri Anwar Ibrahim itu juga berkata beliau tidak menyamakan Perdana Menteri Datuk Seri Dr Mahathir Mohamad dengan bekas Presiden Filipina Ferdinand Marcos seperti yang dilaporkan.

"Mana Kak Wan burukkan nama Malaysia, saya cintakan negara saya," katanya kepada pemberita ketika ditemui pada satu majlis di rumah seorang penyokong Keadilan di sini, hari ini.

Azizah dilaporkan oleh media massa sebagai berkata Malaysia kini mempunyai banyak persamaan dengan Filipina ketika negara itu di bawah pemerintahan bekas presiden Ferdinand Marcos.

Wan Azizah menjelaskan kehadirannya di Filipina adalah atas undangan sebuah yayasan untuk menerima "Anugerah Malalos" sempena memperingati sekumpulan wanita dari Daerah Malolos yang mula-mula bangkit menentang penjajahan Sepanyol.

Menurut Azizah lagi, dalam majlis penyampaian anugerah itu itu beliau hanya mengucapkan terima kasih dan percaya Perdana Menteri sendiri akan mengungkap kata-kata yang sama ketika menerima anugerah di luar negara.

Mengenai pertemuan beliau dengan Presiden Filipina, Joseph Estrada, beliau berkata ianya pertemuan peribadi yang berkisar mengenai keadaan suaminya.

-- BERNAMA

MNR PR